



Broj/Број: 01/2a-50-1-2-22/08
Sarajevo/Сарајево, 4.3.2008.godine

ZAPISNIK

22. sjednice Komisije za vanjske poslove Predstavničkog doma Parlamentarne skupštine Bosne i Hercegovine, održane 4.3.2008. godine

Sjednica je počela u 11 sati. Predsjedavao je predsjedavajući Komisije Slavko Matić. Sjednici su prisustvovali članovi Komisije: Slavko Matić, Azra Alajbegović, Milica Marković, Denis Bećirović, Sefer Halilović, Husein Nanić, a za vrijeme rasprave o petoj tački dnevnog reda bio je prisutan i član Komisije Milorad Živković, koji, zbog ranije zakazane sjednice Kolegija Predstavničkog doma, nije mogao prisustvovati ostatku sjednice. Osim članova i privremenog sekretara, sjednici su prisustvovali i gosti: gđa Bejta Ramović, predstavница Ministarstva finansija i trezora BiH, i gosp. Bogdanović, predstavnik Ministarstva vanjskih poslova BiH. Odsutni su bili: Azra Hadžiahmetović, zbog obaveza na fakultetu, i Sadik Ahmetović.

Za sjednicu je usvojen sljedeći

DNEVNI RED

1. Usvajanje zapisnika 20. i 21. sjednice Komisije;
2. Davanje saglasnosti za ratifikaciju Sporazuma između Vijeća ministara BiH i Vlade Republike Mađarske o uspostavljanju Okvirnog programa za finansijsku saradnju (resorno ministarstvo: Ministarstvo finansija i trezora BiH);
3. Utvrđivanje prijedloga za dopunu Odluke o imenovanju interparlamentarnih grupa prijateljstva PSBiH;
4. Razmatranje dokumenta Vijeća Evrope: Izvršavanje obaveza i provođenje postprijemnog programa saradnje (ažurirani pregled događaja april – decembar 2007.) i zauzimanje stava o potrebi razmatranja u Predstavničkom domu;
5. Razmatranje informacije o službenim putovanjima poslanika u inozemstvo;
6. Izvještaj Delegacije u Parlamentarnoj skupštini Vijeća Evrope s prvog dijela redovnog zasjedanja, od 21. do 25. januara 2008.;
7. Razmatranje informacija Ministarstva vanjskih poslova BiH:
 - a) Informacije o sastanku Vijeća EU za vanjske poslove u Briselu,
 - b) Informacije o razgovorima ambasadora/šefa Misije BiH pri EU u Briselu, sastanak Vijeća EU, te diplomatski kontakti predstavnika Misije,
 - c) Informacije o odluci EU o upućivanju Misije na Kosovo,
 - d) Informacije o inicijativi za jačanje parlamentarne saradnje između BiH i Republike Turske;
8. Razmatranje Deklaracije Parlamenta Islamske Republike Iran;
9. Tekuća pitanja: Upoznavanje o informacijama Ministarstva vanjskih poslova BiH:
 - a) Informacija o sastanku ambasadora BiH u Japanu sa zvaničnicima MVP Japana,
 - b) Vijeće Evrope, izbor novog predsjednika i 25 zamjenika PSVE,

- c) Pismo predsjednika Hrvatskog sabora predsjedavajućem Predstavničkog doma,
- d) Pismo predsjednika Narodne skupštine Republike Srbije predsjedavajućem Predstavničkog doma,
- e) Posjeta Svepartijske grupe za BiH u Parlamentu Ujedinjenog Kraljevstva Bosni i Hercegovini,
- f) Informacija o sastanku predstavnika Ambasade BiH u Berlinu s članovima Bundestaga,
- g) Delegacija Evropske komisije u BiH, pismo predsjedavajućim oba doma PSBiH.

Ad. 1. Usvajanje zapisnika 20. i 21. sjednice Komisije

Predsjedavajući Komisije Slavko Matić naveo je da su zapisnici priloženi u materijalu svim članovima Komisije te otvorio raspravu.

Za riječ se javila Azra Alajbegović objašnjavajući da je njeno odsustvo sa 20. sjednice Komisije bilo opravdano službenim putovanjem, te da to treba naglasiti u Zapisniku.

Predlažio je da se za svakog člana koji nije u mogućnosti da prisustvuje u zapisniku navede razlog odsustva. Husein Nanić obrazložio je svoje i odsustvo Sadika Ahmetovića s 21. sjednice i predložio da se to konstatira. S ovim primjedbama, zapisnici su usvojeni jednoglasno.

Ad. 2. Davanje saglasnosti za ratifikaciju Sporazuma između Vijeća ministara BiH i Vlade Republike Mađarske o uspostavljanju Okvirnog programa za finansijsku saradnju (resorno ministarstvo: Ministarstvo finansija i trezora BiH)

Obrazloženje o ovom sporazumu dali su gosp. Bogdanović iz Ministarstva vanjskih poslova BiH i gđa Bejta Ramović iz Ministarstva finansija i trezora BiH. Nakon obrazloženja, saglasnost za ratifikaciju data je s pet glasova "za" i jednim "suzdržanim".

Ad. 3. Utvrđivanje prijedloga za dopunu Odluke o imenovanju interparlamentarnih grupa prijateljstva PSBiH

Sekretar Komisije obrazložio je razloge za dopunu grupa prijateljstva, kao i prijedlog za dopunu, nakon čega su članovi Komisije jednoglasno utvrdili prijedlog za dopunu Odluke o imenovanju interparlamentarnih grupa prijateljstva PSBiH, u tekstu koji je predložio privremeni sekretar Komisije i prosljedili ga Kolegiju Predstavničkog doma na mišljenje.

Ad. 4. Razmatranje dokumenta Vijeća Evrope: Izvršavanje obaveza i provođenje postprijemnog programa saradnje (ažurirani pregled događaja april – decembar 2007.) i zauzimanje stava o potrebi razmatranja u Predstavničkom domu

Predsjedavajući Komisije u uvodnim napomenama o ovoj tački dnevnog reda naglasio je da ovaj dokument treba prosljediti na razmatranje Predstavničkom domu Parlamentarne skupštine BiH. Bećirović i Nanić saglasili su se s predsjedavajućim, podržavajući navedeni prijedlog jer, kako je naveo Nanić, ovo tema prevazilazi nadležnosti Komisije za vanjske poslove.

Nakon kratke rasprave, članovi Komisije jednoglasno su odlučili da podrže **zaključak** kojim se konstatira da je Komisija razmotrila dokument Vijeća Evrope: Izvršavanje obaveza i provođenje postprijemnog programa saradnje (ažurirani pregled događaja april – decembar 2007.) i smatra potrebnim da se on razmatra na jednoj od narednih sjednica Predstavničkog doma.

Ad . 5. Razmatranje informacije o službenim putovanjima poslanika u inozemstvo

Nakon što je obrazloženje dao privremeni sekretar Komisije, predsjedavajući je otvorio raspravu.

Milica Marković je, obraćajući se Denisu Bećiroviću kao predlagачu ove tačke dnevnog reda, navela da, iako ne spori pravo da se o ovome raspravlja, Komisija za vanjske poslove ima drugih bitnijih stvari na koje se treba koncentrirati, te da razumije opoziciju koja želi od svega napraviti veliku stvar pa i od službenih putovanja. Bećirović je odgovorio da predlaganje ove tačke dnevnog reda i rasprava o njoj nije stvar odnosa između pozicije i opozicije, te da su prijedlog za raspravu o ovoj temi podržala i dva člana Komisije iz SDA. Pitanje koje je bitno odnosi se na kriterije prema kojima skoro uvijek isti članovi putuju na službena putovanja, a drugi jako rijetko ili nikako.

Milorad Živković naveo je da su od 1. januara tekuće godine uvedena nova pravila koja se tiču službenih putovanja. Neka od pravila su da službena putovanja ne smiju biti za vrijeme održavanja sjednica, zatim da su putovanja koja se tiču EU i NATO integracija prioriteta i da će se ubuduće više voditi računa o ravnopravnoj nacionalnoj, stranačkoj i gender zastupljenosti onih koji putuju.

Azra Alajbegović navela je da su službena putovanja bitna zbog predstavljanja Bosne i Hercegovine na adekvatan način. Više pažnje treba posvetiti izvještajima koji oni podnose nakon putovanja i njihovim efektima, s čim su svi bili saglasni.

Milorad Živković, kao predsjedavajući Predstavničkom domu Parlamentarne skupštine BiH, upoznao je prisutne da Kolegij Doma na današnjoj sjednici treba da usvoji informaciju koja se tiče ove tačke dnevnog reda, te da će im ona biti odmah uručena.

Ad. 6. Izvještaj Delegacije u Parlamentarnoj Skupštini Vijeća Evrope s prvog dijela redovnog zasjedanja, od 21. do 25. januara 2008.

Komisija za vanjske poslove konstatirala je da je upoznata s informacijama koje sadrži Izvještaj, te ga je primila na znanje.

Ad. 7. Razmatranje informacija Ministarstva vanjskih poslova BiH:

- a) Informacije o sastanku Vijeća EU za vanjske poslove u Briselu,**
- b) Informacije o razgovorima ambasadora/šefa Misije BiH pri EU u Briselu, sastanak Vijeća EU, te diplomatski kontakti predstavnika Misije,**
- c) Informacije o odluci EU o upućivanju Misije na Kosovo,**
- d) Informacije o inicijativi za jačanje parlamentarne saradnje između BiH i Republike Turske.**

Obrazloženje je dao gosp. Bogdanović iz Ministarstva vanjskih poslova BiH, nakon čega su članovi Komisije zaključili da su upoznati o informacijama iz ove tačke dnevnog reda, te da su ih primili na znanje.

Nakon usvajanja zaključka, predsjedavajući je predložio da bi trebalo odgovoriti na dopis Ministarstva vanjskih poslova BiH o inicijativi za jačanje parlamentarne saradnje između BiH i Republike Turske, kojim smo obaviješteni o spremnosti turske strane da primi u posjetu našu komisiju nakon čega je donesen **zaključak** kojim se obavještava turska strana, putem naše ambasade u Republici Turskoj, o spremnosti Komisije za vanjske poslove Predstavničkog doma da posjeti Parlament Republike Turske.

Ad. 8. Razmatranje Deklaracije Parlamenta Islamske Republike Iran

Privremeni sekretar Komisije za vanjske poslove Davorin Semenik dao je uvodnu riječ i obrazložio ovu tačku dnevnog reda. Naveo je da se ova deklaracija odnosi na stanje između Palestine i Izraela, te ovim putem Parlament Islamske Republike Iran, obraćajući se parlamentima u svijetu, poziva na osudu izraelskog nasilja nad Palestinom. Predsjedavajući Matić zaključio je da nije stvar Komisije da se stavlja na bilo čiju stranu u ovom sukobu, te da smatra da treba zauzeti stav da članovi Komisije podržavaju svako mirno rješenje sukoba. Nakon kraće rasprave, usvojen je **zaključak** kojim se Kolegij Predstavničkog doma obavještava o tome da je Komisija razmatrala Deklaraciju Parlamenta Islamske Republike Iran i zauzela stav da principijelno podržava mirno rješenje sukoba između Izraela i Palestine i ostavlja Kolegiju da ocijeni da li postoji potreba za razmatranjem ove deklaracije na sjednici Doma.

Ad.9. Tekuća pitanja: Upoznavanje o informacijama Ministarstva vanjskih poslova BiH:

- a) Informacija o sastanku ambasadora BiH u Japanu sa zvaničnicima MVP Japana,
- b) Vijeće Evrope, izbor novog predsjednika i 25 zamjenika PSVE,
- c) Pismo predsjednika Hrvatskog sabora predsjedavajućem Predstavničkog Doma,
- d) Pismo predsjednika Narodne skupštine Republike Srbije predsjedavajućem Predstavničkog doma,
- e) Posjeta Svepartijske grupe za BiH u Parlamentu Ujedinjenog Kraljevstva Bosni i Hercegovini,
- f) Informacija o sastanku predstavnika Ambasade BiH u Berlinu sa članovima Bundestaga,
- g) Delegacija Evropske komisije u BiH, pismo predsjedavajućim oba doma PSBiH.

Obrazloženje o ovoj tački dnevnog reda dao je Slavko Matić, nakon čega je usvojen **zaključak** kojim se konstatira da je Komisija upoznata o informacijama i prima ih na znanje, a nakon toga i **zaključak** kojim se traži da se, nakon usvajanja dopune Odluke o imenovanju interparlamentarnih grupa prijateljstva, o njihovom sastavu obavijeste parlamenti svih zemalja za koje su ove grupe imenovane.

Sjednica je završena u 12,30 sati.

PRIVREMENI SEKRETAR

PREDSJEDAVAJUĆI

Davorin Semenik

Slavko Matić